

CONVENIO DE COLABORACIÓN ENTRE O CONSELLO GALEGO DE RELACIÓNS LABORAIS E A UNIVERSIDADE DE SANTIAGO DE COMPOSTELA PARA A REALIZACIÓN DA XXIX EDICIÓN DO CURSO SUPERIOR DE RELACIÓNS LABORAIS, QUE INTEGRA OS DENOMINADOS CURSO DE POSGRAO DE ESPECIALIZACIÓN EN RELACIÓNS LABORAIS (CÓDIGO EI38) E CURSO DE EXPERTO EN RELACIÓNS LABORAIS (CÓDIGO FI82)

MEMORIA XUSTIFICATIVA

Que o Consello de Relacións Laborais acordou, en xuntanza da Comisión Permanente de data 10 de setembro de 2018, a realización dunha nova edición do Curso Superior de Relacións Laborais, co obxecto de afondar e promover as actividades docentes directamente relacionadas co mundo laboral e a formación e a especialización de profesionais nesta materia, e para isto solicitar á USC a súa colaboración para o referido Curso.

Que de conformidade co establecido nos artigos 19.4.a) e 26 da Lei 9/2007, do 13 de xuño, de subvencións de Galicia e no artigo 37 do Decreto 11/2009, do 8 de xaneiro, polo que se aproba o seu Regulamento, resólvese a concesión directa á Universidade de Santiago de Compostela da subvención nominativa regulada neste convenio, posto que a referida Universidade é a única institución capacitada para o desenvolvemento deste Curso superior de Relacións Laborais que se quere realizar, que integra os títulos de especialización e experto en relacións laborais, por ser ambos títulos propios de posgrao e formación continua, respectivamente, que unicamente oferta, no ámbito académico da Comunidade Autónoma de Galicia, a Universidade de Santiago de Compostela, o que dificulta a aplicación dos principios de publicidade e concorrência pública.

Ao ser unha subvención nominativa, segundo o artigo 37, parágrafo 2 do Regulamento da Lei 9/2007, do 13 de xuño, de subvencións de Galicia, o convenio será o instrumento habitual para canalizar estas subvencións.

Que o período de vixencia do convenio estenderase dende **a súa data de sinatura ata o 31 de outubro de 2019**, sen prexuízo de que serán obxecto de subvención as actividades que se desenvolverán desde o 1 de xaneiro de 2019, de conformidade co establecido no artigo 2.1.b) da Lei 9/2007, do 13 de xuño, de subvencións de Galicia.

Que o instrumento convencional que se pretende asinar fundaméntase no seguinte: A Universidade de Santiago de Compostela e o Consello Galego de Relacións Laborais ofertan este curso conscentes da demanda social de ensinanzas do máis alto nivel no campo das relacións laborais, así como da necesidade de promover, nun mercado que se mostra cada vez máis competitivo, a adaptación da xestión das empresas ao novo estilo de dirección de persoal que marca a política de recursos humanos e ás esixencias organizativas das empresas. Que existe converxencia de intereses entre as entidades asinantes en orde á consecución do obxecto referido.

Que o convenio ten por obxecto establecer as condicións polas que se rexerá a colaboración entre o Consello Galego de Relacións Laborais e a Universidade de Santiago de Compostela para a realización do CURSO SUPERIOR DE RELACIÓNS LABORAIS, que se desenvolverá entre os meses de xaneiro e xullo do ano 2019 na Facultade de Dereito da Universidade de Santiago de Compostela.

Que os obxectivos que se pretenden cubrir co desenvolvemento do curso son:

- a) Proporcionar unha formación e/ou actualización nas materias laborais en xeral.
- b) Facilitar a capacitación do alumnado para resolver as cuestións asociadas ás relacións laborais e á xestión de recursos humanos.
- c) Dotar ao alumnado dun dominio interdisciplinar da materia a través da adaptación dos contidos didácticos ao novo marco legal e convencional polo que discorren as relacións laborais e de seguridade social.
- d) Afondar nas consecuencias prácticas dos procesos de reforma que afectan ao mercado de traballo (formas de contratación, organización do traballo, extinción do contrato de traballo), á negociación colectiva, á representación das traballadoras e dos traballadores na empresa, á seguridade social, á previsión de riscos laborais e saúde laboral, así como á repercusión que ten o Dereito social comunitario sobre as lexislacións sociais dos distintos Estados membros da Unión Europea.
- e) En definitiva, que o alumnado atope no curso un lugar de exposición e debate dos cambios que se veñen producindo na lexislación laboral.

O Curso concíbese como un instrumento de especialización e perfeccionamento profesional dos Grados en Dereito, Ciencias do Traballo e Ciencias Económicas e Empresariais, Relacións laborais, así como de responsables de recursos humanos, de relacións laborais e de asesorías e cadros de organizacións sindicais e empresariais.

Establécese como dereito de matrícula a cantidade de mil trescentos euros (1.300,00€) por alumno/a, que serán aboados á Universidade de Santiago de Compostela. O Consello Galego de Relacións Laborais financiará 20 prazas destinadas aos cadros das organizacións empresarial e sindicais que integran o Consello. O pagamento dos dereitos de matrícula das 20 prazas financiadas (26.000,00€) será satisfeito por este organismo e aboadado á USC unha vez formalizado este convenio e á marxe da subvención nominativa nel regulada.

O Consello Galego de Relacións Laborais contribuirá ao financiamento do curso de posgrao mediante a achega de OITO MIL DOUSCENTOS EUROS (8.200,00€), con cargo ao capítulo IV do seu orzamento, aplicación orzamentaria 09.B1.324A.444.0, denominada “Subvención á USC Curso Superior de Relacións Laborais”, na que está previsto crédito necesario e suficiente na Lei 2/2018, do 26 de decembro, de orzamentos xerais da Comunidade Autónoma de Galicia para o ano 2019.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional, con exclusión doutras figuras.

E para que conste, asíñase esta memoria, en Santiago de Compostela a 13 de xuño de 2019